

1. UVOD

Revizija igra veoma važnu ulogu dajući objektivne i nezavisne izvještaje o pouzdanosti informacija. Ukoliko menadžeri, akcionari, zajmodavci i zakonodavna tijela žele donijeti ispravne odluke o rasporedu resursa, neophodne su im pouzdane i tačne informacije.

Zadnjih dvadesetak godina pojave kao što su protivzakonito djelovanje nekih organizacija i stečajevi velikih društava dovele su do širokih rasprava i istraga, koje su otvorile kritična pitanja o ulozi revizora u takvim situacijama.

Centar za humanu politiku napravio je analizu rada revizorskih institucija u Bosni i Hercegovini do 2008. godine, a nakon toga je pratio rad entitetskih revizorskih institucija i postupanje po revizorskim izvještajima od strane parlamentarnih tijela za reviziju i tužilaštava. Na osnovu analize i praćenja stanja u oblasti revizije javnog sektora utvrdilo se nekoliko bitnih činjenica.

Godišnja revizija finansijskih izvještaja i usklađenosti u Bosni i Hercegovini obavlja se u svim subjektima koji upravljaju budžetima, prihodima i imovinom vrijednom nekoliko desetina milijardi konvertibilnih maraka, a u svakom drugom revizorskom izvještaju postoje nalazi koji imaju obilježja krivičnog djela. Revidirani subjekti, parlamentarna tijela za reviziju, tužilaštva i druge nadležne institucije ne postupaju adekvatno po revizorskim izvještajima, a nije bilo ni smjena niti drugih sankcija za odgovorna lica zbog revizorskih nalaza o ozbiljnim propustima, koji za posljedicu imaju koruptivno ponašanje, velike gubitke javnog novca i druge štete.

Do 2008. godine u FBiH bilo je 35% revizorskih izvještaja sa negativnim i 11% revizorskih izvještaja sa pozitivnim mišljenjem. U Republici Srpskoj bilo je 32% revizorskih izvještaja sa negativnim i 22% revizorskih izvještaja sa pozitivnim mišljenjem. U FBiH u 2011. i 2012. godini nema revizorskih izvještaja sa pozitivnim mišljenjem i svaki četvrti revizorski izvještaj ima negativno mišljenje, dok u Republici Srpskoj više od polovine revizorskih izvještaja ima pozitivno mišljenje i gotovo da nema revizorskih izvještaja sa negativnim mišljenjem.

Olakim davanjem pozitivnih i izbjegavanjem davanja negativnih mišljenja, Glavna služba za reviziju prikriva veliku odgovornost i štetu u pojedinim subjektima javnog sektora u Republici Srpskoj. Bliskost revizora sa vladajućim strukturama, te njihovo zapošljavanje u javnom sektoru i politički pritisak ozbiljno ugrožavaju nezavisnost i ruše povjerenje u Glavne službe za reviziju javnog sektora.